

## 叢之詩鈔

### 比日流言，不以屑懷，賦詩寄薇

苦心不得申所長，四圍酸氣逐炎涼。涉世皆來險馬當，塵纓誰肯濯滄浪。贈君松柏慰老蒼，奚爲不見泠泠七弦獨激昂。浮雲之上蔽頽陽，作無義舉猶謗傷。萬事雖陋形骸外，安得坐捫衣蝨變荒唐。君不見嘲評不值一杯水，爾曹虔婆心可死。

### 讀宛陵詩有懷

薄霧寒山下，淒淒宿鳥過。昨懼成異昔，晚髮豈無多。風雨雞鳴晦，中宵手自摩。吟蟲羨歸翼，擾擾竟如何。

### 夜坐自嘲

世矣非吾願，於年此日春。無違與夫子，慙媿彼讒人。困志乏疏糲，危懷俱後身。老來彌甚意，窮達豈天真。

### 無題

停雲枕上撫存思，鈎轉靈犀待夢時。密札藏微怯別鶴，膠弦未解與通辭。蘭鐙數夕藉嬋淚，鴛瓦餘懷兼霧絲。刻骨無緣駐靈藥，從來已作廣寒枝。

### 昨夜值雨，冬意漸萌，因成二詩

雨師凌翥夜初涼，簷蔔偏知大夢長。晚有西廂無限意，且宜壯髮作疏狂。

雷車狹巷雨淒淒，夜氣初沉望欲迷。除卻紅桑何所似，玉人猶自夢遼西。

### 漫成

舊時王謝杳成空，一片清陰暮色中。閒愁不堪來去燕，又將惆悵怨春風。

### 讀倉央嘉措詩有懷芳薇四首

宛轉多情芍藥詩，持君欲贈費相思。二分瓣是離人淚，莫遣春風問訊時。

騁日閒愁詎未忘，青青不語變枯桑。當時憶我秦簫曲，別後淋漓空斷腸。

欲乞銖衣誦梵經，明珠十斛與娉婷。壁燈一盞堪愁寂，夢得依稀神女靈。

幾年藥餌胃難馴，故作羲皇掉臂身。收拾殘骸心已艾，長思寄與枕邊人。

### 憶江南 寄薇

春過也，膩雨濕庭花。愁似望天涯極目，爲誰銷瘦損鉛華。憑斷小銀斜。

### 卜算子 用蔣鹿潭〈卜算子〉「燕子不曾來」韻，寄芳薇。

倚馬賦奇文，小逕荒廬雨。一枕春陰映晚涼，還記分攜處。塞水漸黃昏，把酒添幽絮。化作啼鵑也是愁，莫向垂楊去。

### 翠樓吟 予賃居既久，薇伴左右，都忘岑寂。甫立夏，即有惜春之雅，賦此以寄。

別鶴歸來，青蕪剩有，相思最無人處。多愁添舊病，向誰訴、漸聽啼宇。章臺如許。縱楚客飄零，濤江催去。尋無據。洞簫清怨，斷塢敲雨。暮暮。正苦清吟。怪謝堂雙燕，一番秋緒。悵黃梅院落，也須有、重游攜語。平窗雲樹。怕瘦盡斜陽，閑情難賦。還知否。六朝煙寺，化成飛絮。

### 瑞鶴仙 燈夕塊坐賦

鏡空銷綠鬢。正寂寂秋聲，裊香分潤。登樓怯愁近。看洄瀾月上，霜痕新恨。征鴻隱隱，念省慣，哀箏未穩。奈蓼風、不捲重簾，密寄小紅芳信。休問。暗蟬先晚，細響梧桐，五陵狂俊。涼思一寸，念別後，斷薰燼。算陽臺舊夢，浮槎水灰，空把閒情喚緊。嘆桃根，點指昏花，爲誰瘦損。